



# Waageclique Rhywälle

Basel 1991

---

## Fasnacht 1993

### Sujet:

### CD-Manie - oder mit de Blatte ischs verby

#### So hän d CD ihre Yystand ghalte:

Am Aafang ischs ganz aifach gsi,  
de gosch in d Stadt und groomsch dert y.  
E weeneli Gmies, e weeneli Fleisch,  
alles das, wo de vo deheim so waisch.  
Doch denn isch alles anderscht koo:  
hesch Fleisch und Gmies bisyte gloo,  
hesch di Zyt im Shop verbrocht,  
hundertert vo Stütz verlocht.  
S Hirni het aifach nimme gschalte,  
so hän d CD ihre Yystand ghalte

Die grosse schwarze Schybye steen im Schatte,  
„In“ sin die glaine, runde Laser-Blatte.  
S Rusche, s Groose und au d Gritz,  
de heersches nimme - s isch kai Witz.

Dr CD-Sound dä isch so guet,  
är goot sogar em Daig ins Bluet,  
Vo linggs nach rächts, vo jung bis alt,  
„Out“ isch wäm dä Sound gaar nid gfallt.

Au mir bsoorgen is wie wild die glaine Däller,  
und alli LP's verschwinde als wie schnäller.  
Es schyynt, als hätt me in dr Stadt  
die guete, alte Blatte satt.

De suechsch und suechsch und findsch en nid,  
dä alti Song als CD-Hit.  
Kasch die beuge, kasch di stregge,  
di verränge, faschd verregge,  
und froogsch denne noch däm Schlager,  
haissts: „Mir hän en nid an Lager!“

D CD sin, das isch richtig,  
zem Dail e weeneli giftig.  
Derftscht aigedlig gaar nid in d Neechi koo,  
falls de dr Stütz wetisch im Däschli loo.

Bi dääre CD-Syychi bisch durchuus under em Hammer,  
de gosch nid emole me go schutte, s isch e Jammer.  
Sitzisch elai deheim mit dine Schybybli,  
ohni Fleisch, ohni Gmies und ohni Wyybli.  
Und wetsch emol e Bierli hintere stürze,  
de deerfsches nid, muesch d Uusgoobe kürze.

Bi uns bläächsch fir e CD wie e Grangge,  
bereits scho an die nyynezwanzig Frangge.  
Us dim Spaarseili hoolsch dr letschti Batze,  
die CD dien bees am Vermeege gratze.  
Doch in Basel wird sogar e Gammeler  
zeme aagfrässene CD-Sammler.

Dr Fiebermässer stygt in d Heechi,  
i ha kai CD in dr Neechi.  
I bsoorg se und ka nid waarte,  
seggle haim und due se staarte.

Au dr Doggter weiss kai Mittel,  
denn sälbscht die im wysse Kittel,  
sin verfalle dääre Noot,  
loose CD's bis s nimm goot.

Was wird numme us is wäärde,  
wie goot s wyter doo uff Äärde?  
Kenne mr ägschd dere Manie entkoo,  
d Finger vo dene chaibe CD loo?

D Lyt syn abselut verruggt, nimme bache,  
doch sybe Waggis kenne do gaar nyt mache,  
drum waarte mir bis das Blatt sich keert  
und au dr Bebbi eppis leert.

---

Waageclique Rhywälle 1993

D Ladäärneusstellig isch vom Mändig znacht, em  
1. Merze bis em Mittwoch demorge, em 3. Merze 1993  
uff em Minschterplatz. Mr fraien is uff Ihre Bsuech.

Druggerei: S. Bürgin Druck- und Verpackungs AG, Birsfelden